



საქართველოს შინაგან საქმეთა მინისტრის
ბ რ ძ ა ნ ე ბ ა



1/359



18/09/2020

საქართველოს პარლამენტის 2020 წლის 31 ოქტომბრის არჩევნების
თავისუფალ, უსაფრთხო და მშვიდ გარემოში ჩატარების უზრუნველსაყოფად
ზოგიერთი ღონისძიების განხორციელების თაობაზე

საქართველოს პარლამენტის 2020 წლის 31 ოქტომბრის არჩევნების უსაფრთხო და მშვიდ გარემოში ჩატარების უზრუნველსაყოფად საქართველოს შინაგან საქმეთა სამინისტროს მიერ რისკების სწორად შეფასების, სამართალდარღვევათა პრევენციის, მათზე რეაგირების და არჩევნების თავისუფალ გარემოში ჩატარების ხელშეწყობის მიზნით, „პოლიციის შესახებ“ საქართველოს კანონის მე-5 მუხლის მე-3 პუნქტისა და „საქართველოს შინაგან საქმეთა სამინისტროს დებულების დამტკიცების შესახებ“ საქართველოს მთავრობის 2013 წლის 13 დეკემბრის №337 დადგენილებით დამტკიცებული დებულების მე-5 მუხლის მე-2 პუნქტის „ა“ და „ნ“ ქვეპუნქტების საფუძველზე,

ვ ბ რ ძ ა ნ ე ბ ა:

1. დამტკიცდეს:

ა) საქართველოს პარლამენტის 2020 წლის 31 ოქტომბრის არჩევნების თავისუფალ, უსაფრთხო და მშვიდ გარემოში ჩატარების ხელშეწყობის ღონისძიებები ამ ბრძანების №1 დანართის შესაბამისად;

ბ) საქართველოს შინაგან საქმეთა სამინისტროს მოსამსახურეთათვის საქართველოს პარლამენტის 2020 წლის 31 ოქტომბრის არჩევნების პერიოდში, ახალი კორონავირუსით (SARS-CoV-2) გამოწვეულ ინფექციასთან (COVID-19) დაკავშირებული რეკომენდაციები ამ ბრძანების №2 დანართის შესაბამისად.

2. ბრძანება გაეცნოს საქართველოს შინაგან საქმეთა სამინისტროს (შემდგომში – სამინისტრო) სტრუქტურულ ქვედანაყოფებს, ტერიტორიულ ორგანოებს, სამინისტროს მმართველობის სფეროში მოქმედ საჯარო სამართლის იურიდიულ პირებსა და სამინისტროს მმართველობის სფეროში შემავალ სახელმწიფო საქვეუწყებო დაწესებულებებს.

3. ბრძანების მე-2 პუნქტით განსაზღვრული სამინისტროს დანაყოფების ხელმძღვანელებმა უზრუნველყონ ამ ბრძანების თავიანთ დაქვემდებარებაში მყოფ მოსამსახურეთათვის გაცნობა.

4. სამინისტროს ადმინისტრაციამ (დეპარტამენტი) უზრუნველყოს ამ ბრძანების სამინისტროს ვებგვერდზე (info.police.ge) გამოქვეყნება, ხოლო მისი ძალაში შესვლის შემდეგ, ბრძანების ინგლისურენოვანი ტექსტის ამავე ვებგვერდზე განთავსება.

5. ბრძანება ძალაშია სამინისტროს ვებგვერდზე მისი გამოქვეყნებისთანავე და მოქმედებს საქართველოს ცენტრალური საარჩევნო კომისიის მიერ არჩევნების საბოლოო შედეგების შემაჯამებელი ოქმის გამოქვეყნების დღის ჩათვლით.

6. ბრძანება შეიძლება გასაჩივრდეს საქართველოს კანონმდებლობით დადგენილი წესით, მისი ოფიციალურად გამოქვეყნებიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (მისამართი: ქ. თბილისი, აღმაშენებლის ხეივანი №64).

მინისტრი
ვახტანგ გომელაური



საქართველოს პარლამენტის 2020 წლის 31 ოქტომბრის არჩევნების თავისუფალ, უსაფრთხო და მშვიდ გარემოში ჩატარების ხელშეწყობის ღონისძიებები

მუხლი 1. სამართალდარღვევის პრევენციისა და მასზე რეაგირებისათვის პასუხისმგებელი ჯგუფები და მათი ფუნქციები

1. საქართველოს პარლამენტის 2020 წლის 31 ოქტომბრის არჩევნების (შემდგომში – არჩევნები) თავისუფალ, უსაფრთხო და მშვიდ გარემოში ჩატარების ხელშეწყობის მიზნით, არაუგვიანეს 2020 წლის 22 ოქტომბრისა საქართველოს შინაგან საქმეთა სამინისტროს (შემდგომში – სამინისტრო) აჭარის ავტონომიური რესპუბლიკის პოლიციის დეპარტამენტის, ქვემო ქართლის პოლიციის დეპარტამენტის, შიდა ქართლის პოლიციის დეპარტამენტის, მცხეთა-მთიანეთის პოლიციის დეპარტამენტის, კახეთის პოლიციის დეპარტამენტის, სამცხე-ჯავახეთის პოლიციის დეპარტამენტის, იმერეთის, რაჭა-ლეჩხუმისა და ქვემო სვანეთის პოლიციის დეპარტამენტის, გურიის პოლიციის დეპარტამენტის, სამეგრელო-ზემო სვანეთის პოლიციის დეპარტამენტისა და ქალაქ თბილისის პოლიციის დეპარტამენტის სამოქმედო ტერიტორიებზე შეიქმნას სამართალდარღვევების პრევენციისა და მათზე რეაგირებისთვის პასუხისმგებელი ჯგუფები (შემდგომში – ტერიტორიული ჯგუფი).

2. ტერიტორიული ჯგუფის შემადგენლობაში შედის:

- ა) სამინისტროს შესაბამისი ტერიტორიული ორგანოს დირექტორი;
- ბ) სამინისტროს საპატრულო პოლიციის დეპარტამენტის შესაბამისი ტერიტორიული დანაყოფის ხელმძღვანელი;
- გ) სამინისტროს ცენტრალური კრიმინალური პოლიციის დეპარტამენტის ხელმძღვანელის მიერ გამოყოფილი წარმომადგენელი;
- დ) სამინისტროს განსაკუთრებულ დავალებათა დეპარტამენტის შესაბამისი ტერიტორიული დანაყოფის ხელმძღვანელი;
- ე) სამინისტროს მმართველობის სფეროში მოქმედი სსიპ – დაცვის პოლიციის დეპარტამენტის შესაბამისი ტერიტორიული დანაყოფის ხელმძღვანელი (საჭიროების შემთხვევაში);
- ვ) სამინისტროს მმართველობის სფეროში შემავალი სახელმწიფო საქვეუწყებო დაწესებულებების – საგანგებო სიტუაციების მართვის სამსახურის შესაბამისი ტერიტორიული დანაყოფის ხელმძღვანელი.

3. ტერიტორიული ჯგუფის ხელმძღვანელობა და სამინისტროსთან მუდმივი კოორდინაციის უზრუნველყოფა დაევალოს სამინისტროს იმ ტერიტორიული ორგანოს

ხელმძღვანელს ან მის მიერ უფლებამოსილ პირს, რომლის სამოქმედო ტერიტორიაზეც მოქმედებს ტერიტორიული ჯგუფი.

4. ტერიტორიულ ჯგუფს ოპერატიულ მართვაში გადაეცეს მის სამოქმედო ტერიტორიაზე განთავსებული სამინისტროს სისტემის ყველა დანაყოფი (შემდგომში – საპოლიციო ძალები), გარდა სამინისტროს მმართველობის სფეროში შემავალი სახელმწიფო საქვეუწყებო დაწესებულებებისა.

5. ტერიტორიული ჯგუფის ხელმძღვანელმა ან მის მიერ უფლებამოსილმა პირმა საჭიროების შემთხვევაში შეიმუშაოს საზოგადოებრივი წესრიგის უზრუნველყოფის ღონისძიებათა გეგმა ამ დანართით განსაზღვრული ამოცანების შესასრულებლად.

6. საარჩევნო პერიოდში, ტერიტორიულმა ჯგუფმა თავის სამოქმედო ტერიტორიაზე უზრუნველყოს:

ა) არჩევნების უსაფრთხო და თავისუფალ გარემოში ჩატარების ხელშეწყობის მიზნით, მოსალოდნელი საფრთხეების გამომწვევი მიზეზების გამოვლენისა და რისკების მუდმივი შეფასებისათვის საპოლიციო ძალების მიერ გასატარებელ ღონისძიებათა დაგეგმვა და განხორციელების ორგანიზება;

ბ) საუბნო საარჩევნო კომისიის თავმჯდომარის მოთხოვნის შემთხვევაში, საქართველოს ორგანული კანონის „საქართველოს საარჩევნო კოდექსი“ (შემდგომში – საქართველოს საარჩევნო კოდექსი) 59-ე მუხლის მე-6 პუნქტის შესაბამისად, საარჩევნო დოკუმენტაციის, მათ შორის, საარჩევნო ბიულეტენების უსაფრთხო გადაადგილება (გაცილებისა და დაცვის ორგანიზება);

გ) გამოვლენილ სამართალდარღვევებზე დროული და ეფექტიანი რეაგირების ორგანიზება საქართველოს კანონმდებლობის შესაბამისად.

7. ტერიტორიული ჯგუფის შემადგენლობაში არსებული სამინისტროს დანაყოფების ხელმძღვანელებმა საარჩევნო კანონმდებლობის, აგრეთვე საარჩევნო პერიოდში საზოგადოებრივი წესრიგის დარღვევის თაობაზე დაუყოვნებლივ მიაწოდონ ინფორმაცია უშუალო ხელმძღვანელს, კომპეტენციის ფარგლებში.

8. სამინისტროს სტრუქტურული ქვედანაყოფების, ტერიტორიული ორგანოების, სამინისტროს მმართველობის სფეროში შემავალი სახელმწიფო საქვეუწყებო დაწესებულებებისა – საქართველოს სასაზღვრო პოლიციისა და სამინისტროს მმართველობის სფეროში მოქმედი საჯარო სამართლის იურიდიული პირების ხელმძღვანელებმა უზრუნველყონ თავიანთ დაქვემდებარებაში მყოფი მოსამსახურეების მიერ „საქართველოს პოლიციის ეთიკის კოდექსისა და საქართველოს შინაგან საქმეთა სამინისტროს ზოგიერთ მოსამსახურეთა ქცევის ინსტრუქციების დამტკიცების შესახებ“ საქართველოს შინაგან საქმეთა მინისტრის 2013 წლის 31 დეკემბრის №999 ბრძანების №6 დანართით (არჩევნების პერიოდში საქართველოს შინაგან საქმეთა სამინისტროს მოსამსახურეთა სახელმძღვანელო ინსტრუქცია) დადგენილი წესებისა და მოთხოვნების შესრულება.

9. სამინისტროს სტრუქტურული ქვედანაყოფების, ტერიტორიული ორგანოების, სამინისტროს მმართველობის სფეროში შემავალი სახელმწიფო საქვეუწყებო დაწესებულებებისა და სამინისტროს მმართველობის სფეროში მოქმედი საჯარო სამართლის იურიდიული პირების ადამიანური რესურსების მართვაზე პასუხისმგებელი პირი ვალდებულია, არ დაუშვას საარჩევნო სუბიექტების რეგისტრაციის ვადის გასვლიდან კენჭისყრის დღის დამთავრებამდე ხელმძღვანელ თანამდებობის პირთა (სამმართველოს უფროსის მოადგილე და მასზე მაღალი თანამდებობის პირი, აგრეთვე მათთან გათანაბრებული პირები) საკადრო გადაადგილება, გარდა მათი უფლებამოსილების ვადის გასვლის ან/და მათ მიერ კანონის დარღვევის შემთხვევისა.

მუხლი 2. არჩევნების დღემდე საპოლიციო ღონისძიებათა განხორციელების საფუძველი და პირობები

ამ ბრძანების ძალაში შესვლიდან არჩევნების დღის ჩათვლით ტერიტორიულმა ჯგუფმა თავის სამოქმედო ტერიტორიაზე უზრუნველყოს:

ა) სათანადო ზომების მიღება წინასაარჩევნო აგიტაციის მშვიდ და თავისუფალ გარემოში ჩატარების ხელშეწყობისთვის, მათ შორის, „პოლიციის შესახებ“ საქართველოს კანონის მე-19-22-ე, 25-26-ე მუხლებით გათვალისწინებული პრევენციული საპოლიციო ღონისძიებების განხორციელება, თუ არსებობს საკმარისი საფუძველი ვარაუდისთვის, რომ მოსალოდნელია ძალადობა ან საზოგადოებრივი უსაფრთხოებისა და მართლწესრიგის სხვაგვარი დარღვევა, რაც საფრთხეს უქმნის წინასაარჩევნო აგიტაციის პროცესს;

ბ) ამ მუხლის „ა“ ქვეპუნქტით განსაზღვრულ შემთხვევაში საპოლიციო ძალების განლაგება პრევენციისა და სამართალდარღვევაზე ოპერატიული რეაგირების მიზნით.

მუხლი 3. არჩევნების დღეს კენჭისყრის შენობის მიმდებარე ტერიტორიაზე საპოლიციო ღონისძიებათა განხორციელების საფუძველი და პირობები

1. ტერიტორიული ჯგუფი საჭიროების შემთხვევაში შეიმუშავებს უსაფრთხოების გეგმას არჩევნების დღეს კენჭისყრის შენობის მიმდებარე ტერიტორიაზე საპოლიციო ძალების განლაგების მიზნით.

2. საქართველოს საარჩევნო კოდექსის 59-ე მუხლის მე-7 პუნქტით გათვალისწინებულ გამონაკლის შემთხვევაში, საპოლიციო ძალებმა არჩევნების დღეს კენჭისყრის შენობის მიმდებარე ტერიტორიაზე, პრევენციული და სამართალდარღვევაზე რეაგირების ღონისძიებები განახორციელონ, თუ ეს სრულიად აუცილებელია საზოგადოებრივი წესრიგის დარღვევის აღკვეთისათვის ან დაცვისთვის.

3. ამ მუხლის მე-2 პუნქტით გათვალისწინებულ შემთხვევებში, ტერიტორიული ჯგუფები თავიანთ სამოქმედო ტერიტორიაზე უზრუნველყოფენ კენჭისყრის შენობის მიმდებარე ტერიტორიაზე სათანადო რაოდენობის საპოლიციო ძალების წარმომადგენლების გამოცხადებას შესაბამისი უნიფორმით.

4. საპოლიციო ძალებმა კენჭისყრის შენობის მიმდებარე ტერიტორიაზე პრევენციული და სამართალდარღვევაზე რეაგირების ღონისძიებები განახორციელონ იმ შემთხვევაში, თუ:

- ა) სამინისტროს სსიპ – საზოგადოებრივი უსაფრთხოების მართვის ცენტრი „112“-ში შესულია შეტყობინება, ან უშუალოდ პოლიციისათვის პირდაპირი შეტყობინების გზით იდენტიფიცირებული წყაროს მიერ მიწოდებულია ინფორმაცია, ან მედიასაშუალებით ან სხვა ღია წყაროდან მიღებულია ინფორმაცია პირის ან პირთა ჯგუფის მიერ კენჭისყრის შენობის მიმდებარე ტერიტორიაზე სამართალდარღვევის ჩადენის შესახებ;

- ბ) საპოლიციო ძალების წარმომადგენელი კენჭისყრის შენობის მიმდებარე ტერიტორიაზე უშუალოდ შეესწრო საზოგადოებრივი უსაფრთხოების ხელყოფის ფაქტს, მათ შორის, კონფლიქტის გამწვავებას ან ისეთ ქმედებას, რომელიც უხეშად არღვევს საზოგადოებრივ წესრიგს და მოქალაქეთა სიმშვიდეს.

5. ამ მუხლის მე-4 პუნქტის „ა“ ქვეპუნქტით განსაზღვრული შეტყობინების ან სხვა ინფორმაციის მიღების შემთხვევაში, საპოლიციო ძალების წარმომადგენელი რეაგირების განხორციელებამდე მის ხელთარსებული საშუალებებით ამოწმებს ინფორმაციის ნამდვილობას და სანდოობას, მათ შორის, საჭიროების შემთხვევაში, უკავშირდება საუბნო საარჩევნო კომისიის თავმჯდომარეს.

6. ამ მუხლის მე-5 პუნქტით განსაზღვრული ინფორმაციის გადამოწმების ვალდებულება საპოლიციო ძალების წარმომადგენელს არ ეკისრება იმ შემთხვევაში, თუ:

- ა) საუბნო საარჩევნო კომისიის თავმჯდომარის მიერ საპოლიციო ძალები გამოძახებულია საქართველოს საარჩევნო კოდექსის 59-ე მუხლის მე-6 და მე-7 პუნქტების შესაბამისად;

- ბ) მიღებულია შეტყობინება, რომ ჩადენილია ან შესაძლოა ჩადენილ იქნეს საქართველოს სისხლის სამართლის კოდექსით გათვალისწინებული მძიმე ან განსაკუთრებით მძიმე დანაშაული.

7. საზოგადოებრივი უსაფრთხოებისა და მართლწესრიგის დასაცავად კენჭისყრის შენობის მიმდებარე ტერიტორიაზე საპოლიციო ძალებმა „პოლიციის შესახებ“ საქართველოს კანონის მე-18 მუხლით განსაზღვრული შესაბამისი პრევენციული და სამართალდარღვევაზე რეაგირების ღონისძიებები განახორციელონ თანაზომიერების პრინციპის დაცვით. პოლიციელის მიერ შერჩეული შესაბამისი საპოლიციო ღონისძიება უნდა ემსახურობდეს ლეგიტიმური მიზნის მიღწევას, უნდა იყოს გამოსადეგი, აუცილებელი და პროპორციული. შემზღვეველი ხასიათის საპოლიციო ღონისძიების განხორციელება არ უნდა იწვევდეს პირის არჩევნებში მონაწილეობის უფლების ხელყოფას, გარდა იმ შემთხვევისა, თუ:

- ა) კენჭისყრის შენობის მიმდებარე ტერიტორიაზე პირის ყოფნამ, მისი ქმედებიდან გამომდინარე, შეიძლება გამოიწვიოს საარჩევნო პროცესის ბლოკირება;

- ბ) პირი ცდილობს კენჭისყრის შენობაში შეჭრას;

- გ) პირი ქმნის კონფლიქტს სამართალდარღვევის პროვოცირების მიზნით.

8. საზოგადოებრივი უსაფრთხოების დაცვისათვის ან სამართალდარღვევის აღკვეთისათვის საჭირო ღონისძიებების განხორციელების შემდეგ, ხოლო საქართველოს

საარჩევნო კოდექსის 59-ე მუხლის მე-6 პუნქტის შესაბამისად საპოლიციო ძალების საუბნო საარჩევნო კომისიის თავმჯდომარის მიერ გამოძახების შემთხვევაში ასევე მისი თანხმობით, საპოლიციო ძალები დაუყოვნებლივ ტოვებენ კენჭისყრის შენობის მიმდებარე ტერიტორიას.

9. საზოგადოებრივი უსაფრთხოებისა და მართლწესრიგის დარღვევის ან მოსალოდნელი საფრთხის არსებობის შესახებ არასრულყოფილი ინფორმაციის ან/და საექვო ფაქტობრივი გარემოების (მათ შორის, მასობრივი თავშეყრა ან მასობრივი გადაადგილება კონფლიქტის გარეშე) არსებობისას, რომელიც დიდი ალბათობით არ მიუთითებს მოსალოდნელ უშუალო/მყისიერ საფრთხეზე, თუმცა, ამავე დროს არ გამორიცხავს საზოგადოებრივი უსაფრთხოების დარღვევის რისკს, საპოლიციო ძალების მიერ არ ხორციელდება პირის მიმართ შემზღუდველი ხასიათის ღონისძიებები. ამ შემთხვევაში საპოლიციო ძალები იღებენ უსაფრთხოების დამატებით ზომებს, მათ შორის, უზრუნველყოფენ გაძლიერებულ პატრულირებას, რისკის შემცველი ზონების პოლიციის მხედველობის არეში მოქცევას და საზოგადოებრივი უსაფრთხოების დარღვევის შემთხვევაში მყისიერი რეაგირებისთვის მზადყოფნას.

მუხლი 4. კენჭისყრის შენობაში საპოლიციო ღონისძიებათა განხორციელების საფუძველი და პირობები

1. საქართველოს საარჩევნო კოდექსის 59-ე მუხლის მე-6 პუნქტის შესაბამისად, საუბნო საარჩევნო კომისიის თავმჯდომარის მოთხოვნის შემთხვევაში, რა დროსაც ფორმდება შესაბამისი ოქმი, საპოლიციო ძალების წარმომადგენლებმა კენჭისყრის შენობაში პრევენციული და სამართალდარღვევაზე რეაგირების ღონისძიებები განახორციელონ შესაბამისი უნიფორმით.

2. საუბნო საარჩევნო კომისიის თავმჯდომარის მიერ გამოძახებისას საპოლიციო ძალების წარმომადგენლებმა, საჭიროების შემთხვევაში, საგამოძიებო მიზნებისთვის, კენჭისყრის კაბინის გარდა და საარჩევნო პროცესისთვის ხელის შეშლის გარეშე, მათ ხელთ არსებული ნებისმიერი ჩამწერი საშუალებით (სამხრე ვიდეოკამერა, მობილური ტელეფონი, პლანშეტი) დააფიქსირონ მართლსაწინააღმდეგო ფაქტი საქართველოს საარჩევნო კოდექსის მე-8 მუხლის 25-ე პუნქტის შესაბამისად.

3. საპოლიციო ძალების წარმომადგენლებმა საქართველოს საარჩევნო კოდექსის 59-ე მუხლის მე-4 - მე-5 პუნქტების შესაბამისად კენჭისყრის შენობიდან სამართალდამრღვევის გაძევების აღსრულება უზრუნველყონ მხოლოდ საუბნო საარჩევნო კომისიის მიერ შესაბამისი გადაწყვეტილების მიღების შემთხვევაში.

4. საზოგადოებრივი უსაფრთხოების დაცვისათვის, ასევე მართლწესრიგის დარღვევის აღკვეთისათვის საჭირო ღონისძიებათა განხორციელების შემდეგ და საუბნო საარჩევნო კომისიის თავმჯდომარის თანხმობის შემთხვევაში საპოლიციო ძალების წარმომადგენლები დაუყოვნებლივ ტოვებენ კენჭისყრის შენობას.

მუხლი 5. კენჭისყრის დასრულებიდან ხმების დათვლის პროცესის დასრულებამდე საპოლიციო ღონისძიებათა განხორციელების საფუძველი და პირობები

1. კენჭისყრის დასრულებიდან საუბნო საარჩევნო კომისიის მიერ ხმების დათვლის პროცესის დასრულებამდე, საქართველოს საარჩევნო კოდექსის 59-ე მუხლის მე-6 - მე-7 პუნქტების თანახმად, საუბნო საარჩევნო კომისიის თავმჯდომარის მოთხოვნის ან/და კენჭისყრის შენობის მიმდებარედ ხალხის ნაკადის არსებობის შემთხვევაში, საპოლიციო ძალებმა შესაძლო სამართალდარღვევათა აცილების/აღკვეთის მიზნით პრევენციული და სამართალდარღვევაზე რეაგირების ღონისძიებები განახორციელონ სათანადო უნიფორმით, ამ დანართის მე-3 მუხლის მე-7 პუნქტის შესაბამისად.

2. საუბნო საარჩევნო კომისიის მიერ ხმების დათვლის პროცესის დასრულებისას (დათვლილი ბიულეტენების საარჩევნო უბნიდან გატანა), საპოლიციო ძალების წარმომადგენლები კენჭისყრის შენობის მიმდებარე ტერიტორიას ტოვებენ საზოგადოებრივი უსაფრთხოების დაცვისთვის ან დარღვევის აღკვეთისათვის საჭირო ღონისძიებების განხორციელების შემდეგ, ხოლო საუბნო საარჩევნო კომისიის თავმჯდომარის მიერ გამოძახების შემთხვევაში – მისი მხრიდან თანხმობის გაცემისთანავე.

მუხლი 6. ნეიტრალობის პრინციპის დაცვა

პოლიციელი (საპოლიციო ძალების წარმომადგენელი) ვალდებულია სამსახურებრივი მოვალეობის შესრულებისას დაიცვას პოლიტიკური ნეიტრალობის პრინციპი. დაუშვებელია, პოლიციელის (საპოლიციო ძალების წარმომადგენლის) ქმედება პირდაპირ ან არაპირდაპირ იყოს მიმართული რომელიმე პოლიტიკური პარტიის საწინააღმდეგოდ ან მხარდასაჭერად.

სამინისტროს მოსამსახურეთათვის საქართველოს პარლამენტის 2020 წლის 31
ოქტომბრის არჩევნების პერიოდში, ახალი კორონავირუსით (SARS-CoV-2) გამოწვეულ
ინფექციასთან (COVID-19) დაკავშირებული რეკომენდაციები

- საქართველოს პარლამენტის 2020 წლის 31 ოქტომბრის არჩევნების პერიოდში, სამუშაო ადგილებზე ახალი კორონავირუსის (COVID-19) გავრცელების თავიდან აცილების ხელშეწყობის მიზნით, საქართველოს შინაგან საქმეთა სამინისტროს ტერიტორიული ორგანოების სამოქმედო ტერიტორიებზე შეიქმნას კორონავირუსის (COVID-19) გავრცელების პრევენციისა და მათზე რეაგირებისთვის პასუხისმგებელი ჯგუფები (შემდგომში - ტერიტორიული ჯგუფი);
- ტერიტორიული ჯგუფების ხელმძღვანელებმა უნდა შეიმუშაონ კორონავირუსით გამოწვეულ საგანგებო პირობებში სამოქმედო გეგმა;
- ჯანმრთელობის მდგომარეობის შემოწმების მიზნით, სამუშაო ჯგუფმა სამუშაო ადგილზე გამოცხადებისთანავე უნდა განახორციელოს საარჩევნო პროცესში მონაწილე ყველა პოლიციელის თერმოსკრინინგი;
- პოლიციელების გადაადგილებისთვის გამოყენებული ავტოსატრანსპორტო საშუალებები აღჭურვილი უნდა იყოს სულ მცირე 70% -იანი ალკოჰოლის შემცველი სადეზინფექციო ხსნარებით;
- იმისათვის, რათა ყველა პოლიციელის მიერ უსაფრთხოდ განხორცილდეს გადაადგილება, ნებისმიერი ადგილიდან დაკვირვება, სხვადასხვა აუცილებელი აქტივობის განხორციელება, რომელიც დაკავშირებულია სხვა პირებთან უშუალო კონტაქტთან, პოლიციელები აღჭურვილი უნდა იყვნენ ნიღბებით;
- ყველა პოლიციელს უნდა მიეწოდოს ინფორმაცია:
 - კორონავირუსული ინფექციის გადაცემის თავიდან აცილების შესახებ;
 - ხელის ჰიგიენის შესახებ;
 - რესპირატორული ჰიგიენის შესახებ;
 - პირბადის გამოყენებისა და მოცილების შესახებ;
 - უსაფრთხო დისტანციის დაცვის შესახებ;
- საარჩევნო დოკუმენტაციის, მათ შორის, საარჩევნო ბიულეტენების გაცილებისა და დაცვის ორგანიზება უზრუნველყოფილი იყოს იმგვარად, რომ პოლიციელის - გამცილებლის კონტაქტი დოკუმენტაციასთან მაქსიმალურად შეიზღუდოს;
- საპოლიციო ძალებმა, არჩევნების დღეს, კენჭისყრის შენობის მიმდებარე ტერიტორიაზე, პრევენციული და სამართალდარღვევაზე რეაგირების ღონისძიებების

განხორციელების პროცესში, თუ იგი ითვალისწინებს უშუალო კონტაქტს, უნდა გამოიყენონ ერთჯერადი ხელთათმანები;

- საზოგადოებრივი უსაფრთხოების დაცვისათვის ან სამართალდარღვევის აღკვეთისათვის საჭირო ღონისძიებების განხორციელების შემდეგ, როდესაც საპოლიციო ძალები დატოვებენ კენჭისყრის შენობის მიმდებარე ტერიტორიას, უნდა მოახდინონ გამოყენებული ხელთათმანების მოცილება ჰიგიენური ნარჩენებისთვის განკუთვნილ თავდახურულ ყუთში; ამის შემდგომ ხელები უნდა დაიმუშაონ სულ მცირე 70%-იანი სადეზინფექციო ხსნარით;
- ავტოსატრანსპორტო საშუალებაში უნდა განხორციელდეს ხშირად შეხებადი ზედაპირების: ღილაკების, კარების სახელურების და სხვა დეტალების პერიოდული დასუფთავება შესაბამისი კონცენტრაციის სადეზინფექციო ხსნარით;
- საპოლიციო ძალების წარმომადგენლებმა კენჭისყრის შენობაში მართლწესრიგის დარღვევის აღკვეთისათვის საჭირო ღონისძიებათა განსახორციელებლად შესვლის დროს:
 - უნდა გაიარონ დეზობარიერზე;
 - ხელები დაიმუშაონ სადეზინფექციო ხსნარით;
 - გამოიყენონ ნიღაბი.
- იმ შემთხვევაში, როდესაც გადასატანი ყუთის გამოყენებით ხმის მიცემის უფლების რეალიზაცია ხორციელდება:
 - სამედიცინო სტაციონარული დაწესებულების პაციენტებისთვის;
 - საკარანტინო სივრცეებში განთავსებული მოქალაქეებისთვის,
 - თვითიზოლაციაში მყოფი პირებისთვისდა ამ პროცესის განხორციელება საჭიროებს პოლიციელის ჩართვას, პოლიციელი აღჭურვილი უნდა იყოს:
 - ნიღბით,
 - სახის ფარით,
 - ხელთათმანებით;

შენიშვნა:

ახალი კორონავირუსისგან (COVID-19) თავის დაცვის საუკეთესო საშუალებას წარმოადგენს ხელის ჰიგიენის რეგულარულად და საფუძვლიანად შესრულება. შესაბამისად, აუცილებელია განახორციელოთ შემდეგი ღონისძიებები:

- დაიცავით ჰიგიენის წესები;
- მისალმებისას არ ჩამოართვათ ხელი ერთმანეთს და მოერიდეთ სხვებთან კონტაქტს (შეხებას და სხვა);
- სამუშაოების შესრულებისას გამოიყენეთ სრულად ის ინდივიდუალური დაცვის საშუალებები, რომელიც მოგეწოდათ;

- გამოიყენეთ სპირტის შემცველი ხელის საწმენდი საშუალებები იმ შემთხვევაში, თუ ვერ ახერხებთ ხელების დაბანას და გაშრობას. გახსოვდეთ, რომ ხელების დაბანა საპნითა და წყლით არის უპირატესი;
- დახველების და დაცემინების დროს მიიფარეთ სუფთა ხელსახოცი ან იდაყვში მოხრილი მხარი. გამოყენებული ერთჯერადი ხელსახოცი კი გადაადგეთ ურნაში;
- მოერიდეთ ხელებით თვალებზე, ცხვირზე და პირზე შეხებას.